

Broj:01- 02/2-713/26 SK/AGO  
Sarajevo, 24.02.2026. godine

**BOSNA I HERCEGOVINA  
FEDERACIJA BOSNE I HERCEGOVINE**

**PARLAMENT FEDERACIJE  
PREDSTAVNIČKI DOM**  
n/r gđin Dragan Mioković, predsjedavajući  
n/r gđin Damir Nikšić, poslanik

**VLADA FEDERACIJE BOSNE I HERCEGOVINE**  
n/r gđa Edita Kalajdžić, sekretar Vlade FBiH

Bosna i Hercegovina  
Federacija Bosne i Hercegovine  
**PARLAMENT FEDERACIJE**  
SARAJEVO

Primijeno:			
25.02.2026.			
Broj	Broj	Prijava	Vrijednos.
05/1	-02-	47	26

**Predmet:** Odgovor na poslaničko pitanje, **dostavlja se-**

**Veza:** Akt predsjedavajućeg Predstavničkog doma Parlamenta Federacije Bosne i Hercegovine, broj: 05/1-02-47/26 od 18.02.2026. godine i akt sekretara Vlade Federacije Bosne i Hercegovine, broj: 03-04-366/26 od 19.02.2026. godine

Poštovani,

Aktima broj i datum veze, Federalnom ministarstvu rada i socijalne politike dostavljeno je poslaničko pitanje koje je postavio Damir Nikšić, poslanik Predstavničkog doma Parlamenta Federacije BiH, a koje se odnosi na izradu socijalne karte u Federaciji Bosne i Hercegovine.

S tim u vezi, sa aspekta nadležnosti Federalnog ministarstva rada i socijalne politike, ističemo da je Vlada Federacije Bosne i Hercegovine rješenjem V. broj: 311/25 od 13.03.2025. godine, imenovala Interresornu radnu grupu za izradu Prednacrt zakona o jedinstvenoj metodologiji izrade socijalne karte u Federaciji Bosne i Hercegovine. Zadatak Interresorne radne grupe je bio da u roku od tri mjeseca od donošenja rješenja izradi Prednacrt zakona, da za potrebe izrade istog osigura važeću zakonsku i podzakonsku regulativu i ostale neophodne informacije iz nadležnosti organa uprave i drugih institucija iz kojih su delegirani članovi Interresorne radne grupe, te da svoj izvještaj dostavi Federalnom ministarstvu rada i socijalne politike. S tim u vezi, po okončanju utvrđenih zadataka Vlada Federacije Bosne i Hercegovine je zaključkom V. broj: 1585/25 od 07.10.2025. godine, prihvatila Izvještaj o radu Interresorne radne grupe za izradu Prednacrt zakona o jedinstvenoj metodologiji izrade socijalne karte u Federaciji Bosne i Hercegovine, te zadužila Federalno ministarstvo rada i socijalne politike da organizuje javne konsultacije, uključujući objavu integralnog teksta Prednacrt zakona i pratećeg obrazloženja na svojoj službenoj internet stranici, uz jasno naznačene rokove i način dostave komentara na navedeni propis. Također, ovo Ministarstvo je zaduženo da Prednacrt zakona dostavi i svim federalnim ministarstvima, kantonalnim vladama i jedinicama lokalne samouprave (općinama i gradovima) preko Saveza općina i gradova Federacije Bosne i Hercegovine.

Postupajući u skladu sa navedenim, u periodu od 13. oktobra do 13. decembra 2025. godine proveden je dvomjesečni proces konsultacija o Prednacrta Zakona o sistemu društvene karte Federacije Bosne i Hercegovine. Tekst Prednacrta bio je javno dostupan na službenoj internet stranici ovog Ministarstva, zajedno s obrazloženjem ključnih instituta Zakona i standardiziranim obrascem za dostavljanje komentara, čime je svim zainteresovanim subjektima osiguran jednak i nediskriminirajući pristup informacijama, kao i strukturiran način učešća u raspravi.

Naime, kako se radi o zakonu koji uspostavlja horizontalni, intersektorski informacioni sistem, čija se primjena ne veže isključivo uz jedno upravno područje, nego obuhvata socijalnu politiku, fiskalno planiranje, zapošljavanje, zdravstvo, obrazovanje, demografski razvoj, prostorno planiranje i druge segmente javnog djelovanja, njegova priprema nije mogla biti ograničena na uski institucionalni ili stručni krug. Iz tog razloga Federalno ministarstvo rada i socijalne politike, postupajući u skladu sa pravilima participativnog zakonodavnog procesa u Federaciji Bosne i Hercegovine, provelo je sveobuhvatan i transparentan proces javnih konsultacija, s ciljem da se zakonska rješenja oblikuju uz uvažavanje iskustava, potreba i stručnih stajališta relevantnih učesnika. Proces javnih konsultacija je bio otvoren prema širokom krugu učesnika: organima uprave na svim nivoima vlasti, ustanovama i javnim službama, organizacijama civilnoga društva, komorama i strukovnim udruženjima, predstavnicima akademske zajednice, kao i pojedincima koji su željeli dati svoj doprinos. Naglasak je bio na uključivanju onih institucija i organizacija koje u svom radu koriste, generiraju ili analiziraju podatke relevantne za planiranje javnih politika, kako bi se provjerila operativnost, razumljivost i izvedivost predloženih rješenja.

Nakon okončanja procesa javnih konsultacija, zaprimljena očitovanja su analizirana i vrednovana, te su, gdje je to bilo moguće i opravdano, ugrađena u doradenom zakonskom tekstu. U odnosu na početnu verziju, Prednacrt zakona je značajno unaprijeđen, posebno u dijelu koji se odnosi na:

- preciznije definiranje kategorija podataka i njihovih izvora,
- razgraničenje nadležnosti i uloga institucija različitih nivoa vlasti,
- nosioce i obrađivače službenih evidencija,
- zaštitu ličnih podataka i informacijsku sigurnost,
- tehničku interoperabilnost registara,
- te faznu i fiskalno održivu provedbu Zakona.

U smislu navedenog, predviđeno je da Sistem društvene karte omogućava prikupljanje, preuzimanje, razmjenu, povezivanje, obradu, analitičku upotrebu i pohranu podataka značajnih za ocjenu socijalnih, ekonomskih, obrazovnih, zdravstvenih, stambenih, demografskih, sigurnosnih i drugih obilježja pojedinaca, domaćinstava i lokalnih zajednica. Prema Prednacrta zakona, Federalno ministarstvo rada i socijalne politike nadležno je za uspostavljanje i upravljanje sistemom društvene karte, te je odgovorno za njegov razvoj, funkcionisanje, koordinaciju, nadzor i unapređenje u skladu s odredbama ovoga zakona, dok svi nadležni organi, nosioci službenih evidencija i drugi subjekti uključeni u dostavu, obradu, razmjenu ili korištenje podataka obavezni su saradivati s Ministarstvom, te mu pružati potrebnu stručnu, tehničku, kadrovsku i drugu podršku radi uspostave, funkcionisanja i daljeg razvoja sistema društvene karte.

Unaprijeđeni tekst Prednacrt zakona je u toku januara 2026. godine, dostavljen Agenciji za zaštitu ličnih podataka u Bosni i Hercegovini, svim federalnim ministarstvima, nadležnim federalnim upravama, zavodima i drugim institucijama (Poreznoj upravi Federacije Bosne i Hercegovine, Federalnom zavodu za programiranje razvoja, Federalnom zavodu za statistiku, Federalnoj upravi za geodetske i imovinsko-pravne poslove, Federalnom zavodu za penzijsko i invalidsko osiguranje, Federalnom zavodu za zapošljavanje, Zavodu zdravstvenog osiguranja i reosiguranja Federacije Bosne i Hercegovine, Zavodu za javno zdravstvo Federacije Bosne i Hercegovine, Institutu za medicinsko vještačenje zdravstvenog stanja, Fondu za profesionalnu rehabilitaciju i zapošljavanje osoba sa invaliditetom), kantonalnim vladama, te Savezu općina i gradova Federacije Bosne i Hercegovine, radi davanja mišljenja.

Također, Prednacrt zakona je dostavljen i Federalnom ministarstvu finansija, Federalnom ministarstvu pravde i Uredu Vlade Federacije Bosne i Hercegovine za zakonodavstvo i usklađenost sa propisima Europske unije, radi davanja mišljenja u skladu sa Poslovníkom o radu Vlade Federacije Bosne i Hercegovine – Prečišćeni tekst ("Službene novine Federacije BiH", br. 6/10, 37/10, 62/10, 39/20 i 67/21).

Prednacrt zakona o sistemu društvene karte Federacije Bosne i Hercegovine je dana 02.02.2026. godine, dostavljen Vladi Federacije Bosne i Hercegovine radi razmatranja. S tim u vezi, pomenuti zakon će biti dostavljen u dalju parlamentarnu proceduru nakon što isti bude razmatran od strane Vlade Federacije Bosne i Hercegovine i utvrđen u formi Nacrta.

S poštovanjem,



**Dostavljeno:**

- Naslovu
- a/a